

Bil. S 60

**AKTA CUKAI PENDAPATAN  
(PENGGAL 35)**

**PERINTAH CUKAI PENDAPATAN (PERTUKARAN MAKLUMAT)  
(KANADA), 2014**

BAHAWASANYA adalah diperuntukkan oleh bab 41(1) dari Akta Cukai Pendapatan bahawa jika Kebawah Duli Yang Maha Mulia Paduka Seri Baginda Sultan dan Yang Di-Pertuan dalam Majlis Mesyuarat dengan perintah mengisyiharkan bahawa penyusunan yang dinyatakan dalam perintah itu telah dibuat dengan Kerajaan mana-mana negara atau wilayah di luar Negara Brunei Darussalam dengan tujuan untuk bertukar-tukar maklumat berhubung dengan cukai di bawah Akta itu dan sebarang cukai yang sama jenisnya yang dikenakan oleh undang-undang negara atau wilayah tersebut, dan bahawa adalah mustahak supaya penyusunan tersebut sepatutnya berkuat kuasa, maka penyusunan tersebut hendaklah berkuat kuasa berhubung dengan cukai dan perkara lain yang berkaitan di bawah Akta itu dengan tidak menghiraukan sebarang apa pun dalam sebarang undang-undang bertulis.

DAN BAHAWASANYA dengan suatu perjanjian bertarikh 9 haribulan Mei 2013 di antara Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dan Kerajaan Kanada, penyusunan telah dibuat antara lain bagi pertukaran maklumat berhubung dengan perkara-perkara cukai.

OLEH YANG DEMIKIAN MAKA adalah dengan ini diisyiharkan oleh Kebawah Duli Yang Maha Mulia Paduka Seri Baginda Sultan dan Yang Di-Pertuan dalam Majlis Mesyuarat bahawa —

*(a)* penyusunan yang dinyatakan dalam Jadual telah dibuat dengan Kerajaan Kanada; dan

*(b)* adalah mustahak bahawa penyusunan itu hendaklah berkuat kuasa dengan tidak menghiraukan apa-apa juga dalam sebarang undang-undang bertulis.

## JADUAL

### PENYUSUNAN YANG DIBUAT DENGAN KERAJAAN KANADA

#### Perkara 1

##### Matlamat dan Skop Perjanjian ini

1. Pihak-pihak berkuasa yang layak di Pihak-Pihak Pejanji hendaklah memberikan bantuan melalui pertukaran maklumat yang dijangka berkaitan dengan perlaksanaan dan penguatkuasaan undang-undang domestik Pihak-Pihak Pejanji berkenaan dengan cukai-cukai yang diliputi oleh Perjanjian ini. Maklumat tersebut hendaklah termasuk maklumat yang dijangka berkaitan dengan penentuan, taksiran dan pemungutan cukai-cukai tersebut, mendapatkan balik dan penguatkuasaan tuntutan-tuntutan cukai, atau penyiasatan atau pendakwaan perkara-perkara cukai. Pertukaran maklumat hendaklah menurut peruntukan-peruntukan Perjanjian ini dan hendaklah disifatkan sebagai sulit mengikut cara yang diperuntukkan dalam Perkara 8.
2. Pihak yang diminta hendaklah mempastikan bahawa sebarang hak atau perlindungan yang diberi kepada orang-orang oleh undang-undang atau amalan pentadbiran Pihak yang diminta tidak dikenakan dengan cara yang menghalang atau melambatkan secara tidak wajar pertukaran maklumat dengan berkesan.

#### Perkara 2

##### Bidang Kuasa

Pihak yang diminta tidak wajib memberikan maklumat yang tidak dipegang oleh pihak-pihak berkuasanya atau tidak ada dalam milikan atau kawalan orang-orang yang berada di dalam bidang kuasa wilayahnya.

#### Perkara 3

##### Cukai-Cukai Yang Diliputi

1. Cukai-cukai yang menjadi perkara Perjanjian ini adalah —
  - (a) di Kanada, semua cukai yang dikenakan atau ditadbir oleh Kerajaan Kanada;
  - (b) di Negara Brunei Darussalam, semua cukai yang dikenakan atau ditadbir oleh Kerajaan Negara Brunei Darussalam.
2. Perjanjian ini hendaklah juga dikenakan kepada apa-apa cukai yang sama yang dikenakan selepas tarikh mula berkuatkuasanya Perjanjian ini sebagai tambahan kepada atau bagi menggantikan cukai-cukai sedia ada. Perjanjian ini

hendaklah juga dikenakan kepada apa-apa cukai yang sebahagian besarnya serupa yang dikenakan selepas tarikh mula berkuatkuasanya Perjanjian ini sebagai tambahan kepada atau bagi menggantikan cukai-cukai sedia ada jika pihak-pihak berkuasa yang layak di Negara-Negara Pejanji bersetuju sedemikian. Lagipun, cukai-cukai yang diliputi boleh diperluaskan atau diubahsuai dengan persetujuan bersama Pihak-Pihak Pejanji dalam bentuk pertukaran surat. Pihak-pihak berkuasa yang layak di Pihak-Pihak Pejanji hendaklah memberitahu antara satu sama lain mengenai apa-apa perubahan besar kepada pencukaian dan langkah-langkah mengumpul maklumat yang berkaitan yang diliputi oleh Perjanjian ini.

#### Perkara 4

##### Takrifan

1. Bagi maksud-maksud Perjanjian ini, melainkan jika ditakrifkan selainnya —

(a) perkataan “Negara Brunei Darussalam” bermakna wilayah Negara Brunei Darussalam termasuk laut wilayahnya, sehingga meliputi ruang udara di atas wilayah tersebut, yang ke atasnya Negara Brunei Darussalam menjalankan kedaulatan, dan kawasan maritim yang melimpasi laut wilayahnya, termasuk dasar laut dan tanah bawah, yang telah atau mungkin selepas ini ditetapkan di bawah undang-undang Negara Brunei Darussalam sebagai suatu kawasan yang ke atasnya Negara Brunei Darussalam menjalankan hak kedaulatan dan bidang kuasa menurut undang-undang antarabangsa;

(b) perkataan “Kanada”, digunakan bagi maksud geografi, bermakna —

- (i) wilayah darat, ruang udara, perairan pedalaman dan laut wilayah Kanada;
- (ii) zon ekonomi eksklusif Kanada, sebagaimana yang ditentukan oleh undang-undang domestiknya, selaras dengan Bahagian V Konvensyen Bangsa-Bangsa Bersatu mengenai Undang-Undang Laut bertarikh 10 Disember 1982; dan
- (iii) pelantar benua Kanada, sebagaimana yang ditentukan oleh undang-undang domestiknya, selaras dengan Bahagian VI Konvensyen Bangsa-Bangsa Bersatu mengenai Undang-Undang Laut bertarikh 10 Disember 1982;

(c) perkataan “Pihak Pejanji” bermakna Kanada atau Negara Brunei Darussalam mengikut kehendak konteksnya;

(d) perkataan “pihak berkuasa yang layak” bermakna —

- (i) dalam hal Kanada, Menteri Hasil Negara atau wakil Menteri yang diberi kuasa;
  - (ii) dalam hal Negara Brunei Darussalam, Menteri Kewangan atau wakil Menteri yang diberi kuasa;
- (e) perkataan "orang" termasuk seseorang individu, sesebuah syarikat, suatu amanah, suatu perkongsian dan mana-mana kumpulan orang lain;
- (f) perkataan "syarikat" bermakna mana-mana badan korporat atau mana-mana entiti yang disifatkan sebagai suatu badan korporat bagi maksud-maksud cukai;
- (g) perkataan "syarikat dagangan awam" bermakna mana-mana syarikat yang kelas saham-sahamnya yang utama disenaraikan dalam sebuah bursa saham yang diiktiraf dengan syarat bahawa saham-sahamnya yang tersenarai boleh dibeli dan dijual dengan senang oleh orang ramai. Saham-saham boleh dibeli atau dijual "oleh orang ramai" jika pembelian atau penjualan saham-saham tidak dibataskan secara tersirat atau nyata kepada suatu kumpulan pelabur yang terhad;
- (h) perkataan "kelas saham-saham yang utama" bermakna kelas atau kelas-kelas saham yang menggambarkan majoriti kuasa mengundi dan nilai syarikat;
- (i) perkataan "bursa saham yang diiktiraf" bermakna mana-mana bursa saham yang dipersetujui oleh pihak-pihak berkuasa yang layak di Pihak-Pihak Pejanji;
- (j) perkataan "dana atau skim pelaburan kolektif" bermakna apa-apa alat pelaburan terkumpul, tanpa mengira bentuk undang-undang. Perkataan "dana atau skim pelaburan kolektif awam" bermakna mana-mana dana atau skim pelaburan kolektif dengan syarat unit-unit, saham-saham atau kepentingan lain ke atas dana atau skim itu boleh dibeli atau dijual dengan senang, atau dibeli dan ditebus dengan senang, oleh orang ramai. Unit-unit, saham-saham atau kepentingan lain ke atas dana atau skim itu boleh dibeli, dijual atau ditebus dengan senang "oleh orang ramai" jika pembelian, penjualan atau penebusan itu tidak dibataskan secara tersirat atau nyata kepada suatu kumpulan pelabur yang terhad;
- (k) perkataan "cukai" bermakna apa-apa cukai yang dikenakan Perjanjian ini;
- (l) perkataan "Pihak pemohon" bermakna Pihak Pejanji yang meminta maklumat;

(m) perkataan "Pihak yang diminta" bermakna Pihak Pejanji yang diminta untuk memberikan maklumat;

(n) perkataan "langkah-langkah mengumpul maklumat" bermakna undang-undang dan prosedur pentadbiran atau kehakiman yang membolehkan suatu Pihak Pejanji mendapatkan dan memberikan maklumat yang diminta; dan

(o) perkataan "maklumat" bermakna apa-apa fakta, pernyataan atau rekod dalam apa jua bentuk pun.

2. Berhubung dengan pengenaan Perjanjian ini pada bila-bila masa oleh suatu Pihak Pejanji, apa-apa perkataan yang tidak ditakrifkan dalam Perjanjian ini hendaklah, melainkan jika maksudnya berkehendakkan makna yang lain, mempunyai makna yang dipunyainya pada masa itu di bawah undang-undang Pihak itu, apa-apa makna di bawah undang-undang cukai Pihak itu yang terpakai mengatasi makna yang diberikan kepada perkataan tersebut di bawah undang-undang lain Pihak itu.

### **Perkara 5**

#### **Pertukaran Maklumat Apabila Diminta**

1. Pihak berkuasa yang layak di Pihak yang diminta hendaklah memberikan maklumat apabila diminta bagi maksud-maksud yang disebut dalam Perkara 1. Pertukaran maklumat tersebut hendaklah dibuat tanpa mengambil kira sama ada kelakuan yang sedang disiasat akan menjadi suatu jenayah di bawah undang-undang Pihak yang diminta jika kelakuan tersebut berlaku di dalam wilayah Pihak yang diminta.

2. Jika maklumat yang ada dalam milikan pihak berkuasa yang layak di Pihak yang diminta tidak mencukupi untuk membolehkannya mematuhi permintaan bagi maklumat itu, Pihak itu hendaklah menggunakan semua langkah mengumpul maklumat yang berkaitan untuk memberikan maklumat yang diminta itu kepada Pihak pemohon, walaupun Pihak yang diminta tidak mungkin memerlukan maklumat tersebut bagi maksud-maksud cukainya sendiri.

3. Jika diminta secara khusus oleh pihak berkuasa yang layak di Pihak pemohon, pihak berkuasa yang layak di Pihak yang diminta hendaklah memberikan maklumat di bawah Perkara ini, setakat yang dibenarkan di bawah undang-undang domestik Pihak yang diminta, dalam bentuk pernyataan bersumpah yang dibuat oleh saksi-saksi dan salinan rekod asal yang diakui sah.

4. Tiap-tiap Pihak Pejanji hendaklah memastikan bahawa pihak berkuasanya yang layak bagi maksud-maksud yang dinyatakan dalam Perkara 1 Perjanjian ini, mempunyai kuasa untuk mendapatkan dan memberikan apabila diminta —

(a) maklumat yang dipegang oleh bank, institusi kewangan lain, dan mana-mana orang yang bertindak atas sifat agensi atau fidusiari termasuk penama dan pemegang amanah;

(b) maklumat berhubung dengan pemilikan syarikat, perkongsian, amanah, yayasan, "Anstalten" dan orang lain, termasuk, dalam hambatan Perkara 2, maklumat pemilikan mengenai semua orang dalam suatu rangkaian pemilikan; dalam hal amanah, maklumat mengenai setlor, pemegang amanah dan benefisiari; dan dalam hal yayasan, maklumat mengenai pengasas, ahli-ahli majlis yayasan dan benefisiari. Perjanjian ini tidak mewujudkan suatu obligasi kepada Pihak-Pihak Pejanji untuk mendapatkan atau memberikan maklumat pemilikan berkenaan dengan syarikat-syarikat dagangan awam atau dana atau skim pelaburan kolektif awam melainkan jika maklumat tersebut dapat diperolehi tanpa menimbulkan kesukaran yang tidak berpadanan.

5. Pihak berkuasa yang layak di Pihak pemohon hendaklah memberikan maklumat yang berikut kepada pihak berkuasa yang layak di Pihak yang diminta apabila membuat suatu permintaan maklumat di bawah Perjanjian ini untuk menunjukkan jangkaan kaitan maklumat tersebut dengan permintaan itu —

(a) identiti orang yang diperiksa atau disiasat;

(b) suatu pernyataan mengenai maklumat yang diminta termasuk jenisnya dan bentuk bagaimana Pihak pemohon ingin menerima maklumat itu daripada Pihak yang diminta;

(c) tujuan cukai yang baginya maklumat itu diminta;

(d) alasan untuk mempercayai bahawa maklumat yang diminta itu dipegang dalam wilayah Pihak yang diminta atau ada dalam milikan atau kawalan seseorang di dalam bidang kuasa Pihak yang diminta;

(e) setakat yang diketahui, nama dan alamat mana-mana orang yang dipercayai ada memiliki maklumat yang diminta itu;

(f) suatu pernyataan bahawa permintaan itu adalah menepati dengan undang-undang dan amalan pentadbiran Pihak pemohon, bahawa jika maklumat yang diminta itu adalah di dalam bidang kuasa Pihak pemohon maka pihak berkuasa yang layak di Pihak pemohon akan dapat memperolehi maklumat itu di bawah undang-undang Pihak pemohon atau dalam perjalanan biasa amalan pentadbiran dan bahawa ia adalah menepati dengan Perjanjian ini; dan

(g) suatu pernyataan bahawa Pihak pemohon telah menggunakan segala cara yang ada dalam wilayahnya sendiri untuk mendapatkan maklumat itu, kecuali cara-cara yang akan menimbulkan kesukaran yang tidak berpadanan.

6. Pihak berkuasa yang layak di Pihak yang diminta hendaklah mengakui penerimaan permintaan itu kepada pihak berkuasa yang layak di Pihak pemohon dan hendaklah berusaha dengan sedaya upayanya untuk menghantar maklumat yang diminta itu kepada Pihak pemohon dalam masa yang munasabah.

### **Perkara 6**

#### **Pemeriksaan Cukai Di Luar Negeri**

1. Suatu Pihak Pejanji boleh membenarkan wakil-wakil pihak berkuasa yang layak di Pihak Pejanji yang satu lagi untuk memasuki wilayah Pihak yang mula-mula disebutkan bagi menemuduga individu-individu dan memeriksa rekod-rekod dengan persetujuan bertulis orang-orang yang berkenaan. Pihak berkuasa yang layak di Pihak yang kedua disebutkan hendaklah memberitahu pihak berkuasa yang layak di Pihak yang mula-mula disebutkan mengenai masa dan tempat perjumpaan dengan individu-individu yang berkenaan.

2. Atas permintaan pihak berkuasa yang layak di satu Pihak Pejanji, pihak berkuasa yang layak di Pihak Pejanji yang satu lagi boleh membenarkan wakil-wakil pihak berkuasa yang layak di Pihak yang mula-mula disebutkan untuk hadir dalam sebahagian dari suatu peperiksaan cukai yang berkenaan di dalam wilayah Pihak yang kedua disebutkan.

3. Jika permintaan yang disebut dalam perenggan 2 dipersetujui, pihak berkuasa yang layak di Pihak Pejanji yang menjalankan pemeriksaan itu hendaklah, dengan seberapa segera yang boleh, memberitahu pihak berkuasa yang layak di Pihak yang satu lagi mengenai masa dan tempat pemeriksaan itu, pihak berkuasa atau pegawai yang ditetapkan untuk menjalankan pemeriksaan itu dan prosedur dan syarat-syarat yang dikehendaki oleh Pihak yang mula-mula disebutkan bagi menjalankan pemeriksaan itu. Semua keputusan berkenaan dengan perjalanan pemeriksaan cukai itu hendaklah dibuat oleh Pihak yang menjalankan pemeriksaan itu.

### **Perkara 7**

#### **Kemungkinan Untuk Menolak Permintaan**

1. Pihak yang diminta tidaklah dikehendaki untuk mendapatkan atau memberikan maklumat yang tidak akan dapat diperolehi oleh Pihak pemohon di bawah undang-undangnya sendiri bagi maksud-maksud perlaksanaan atau penguatkuasaan undang-undang cukainya sendiri. Pihak berkuasa yang layak di Pihak yang diminta boleh enggan membantu jika permintaan itu tidak dibuat menepati dengan Perjanjian ini.

2. Peruntukan-peruntukan Perjanjian ini tidak boleh mengenakan kepada suatu Pihak Pejanji obligasi untuk memberikan maklumat yang akan mendedahkan sebarang rahsia perdagangan, perniagaan, perindustrian, komersil,

atau profesional atau proses perdagangan. Dengan tidak menghiraukan peruntukan-peruntukan yang tersebut di atas, maklumat dari jenis yang disebut dalam Perkara 5, perenggan 4, tidaklah boleh disifatkan sebagai rahsia atau proses perdagangan tersebut hanya kerana ia memenuhi kriteria dalam perenggan itu.

3. Peruntukan-peruntukan Perjanjian ini tidak boleh mengenakan kepada suatu Pihak Pejanji obligasi untuk mendapatkan atau memberikan maklumat yang akan mendedahkan perhubungan sulit di antara klien dan peguam, peguamcara atau wakil lain di sisi undang-undang yang diterima jika perhubungan itu dikemukakan bagi maksud-maksud —

(a) meminta atau memberi nasihat undang-undang, atau

(b) untuk digunakan dalam prosiding undang-undang sedia ada atau yang dicadangkan.

4. Pihak yang diminta boleh menolak suatu permintaan maklumat jika pendedahan maklumat itu adalah bertentangan dengan dasar awam (*ordre public*).

5. Suatu permintaan maklumat tidak boleh ditolak atas alasan bahawa tuntutan cukai yang menimbulkan permintaan itu dipertikaikan.

6. Pihak yang diminta boleh menolak suatu permintaan maklumat jika maklumat itu diminta oleh Pihak pemohon untuk melaksanakan atau menguatkuasakan suatu peruntukan undang-undang cukai Pihak pemohon, atau sebarang kehendak yang berhubungan dengannya, yang mendiskriminasikan seseorang rakyat Pihak yang diminta berbanding dengan seseorang rakyat Pihak pemohon dalam hal keadaan yang sama.

## **Perkara 8**

### **Kerahsiaan**

Sebarang maklumat yang diterima oleh suatu Pihak Pejanji di bawah Perjanjian ini hendaklah disifatkan sebagai sulit dan boleh didedahkan hanya kepada orang-orang atau pihak-pihak berkuasa (termasuk mahkamah dan badan pentadbiran) dalam bidang kuasa Pihak Pejanji yang terlibat dalam menaksir atau memungut, menguatkuasakan atau mendakwa berkaitan dengan, atau memutuskan rayuan berkenaan dengan, cukai-cukai dalam bidang kuasa itu. Orang-orang atau pihak-pihak berkuasa itu hendaklah menggunakan maklumat tersebut hanya bagi maksud-maksud tersebut. Mereka boleh mendedahkan maklumat itu dalam prosiding mahkamah awam atau dalam keputusan kehakiman. Maklumat itu tidak boleh didedahkan selainnya kepada mana-mana orang atau entiti atau pihak berkuasa lain atau mana-mana bidang kuasa lain

tanpa persetujuan bertulis yang nyata daripada pihak berkuasa yang layak di Pihak yang diminta.

**Perkara 9**

**Kos**

Insidens kos yang dilakukan dalam memberi bantuan hendaklah dipersetujui oleh pihak-pihak berkuasa yang layak di Pihak-Pihak Pejanji.

**Perkara 10**

**Perjanjian Antarabangsa atau Penyusunan Lain**

Kemungkinan untuk memberi bantuan yang diperuntukkan oleh Perjanjian ini tidak mengehadkan, atau tidak dihadkan oleh, kemungkinan untuk memberi bantuan yang terkandung dalam perjanjian antarabangsa sedia ada atau penyusunan lain di antara Pihak-Pihak Pejanji yang berkaitan dengan kerjasama dalam perkara-perkara cukai.

**Perkara 11**

**Prosedur Persetujuan Bersama**

1. Jika kesukaran atau keraguan timbul di antara Pihak-Pihak Pejanji berhubung dengan perlaksanaan atau tafsiran Perjanjian ini, pihak-pihak berkuasa yang layak hendaklah berusaha untuk menyelesaikan perkara itu dengan persetujuan bersama.
2. Sebagai tambahan kepada persetujuan yang disebut dalam perenggan 1, pihak-pihak berkuasa yang layak di Pihak-Pihak Pejanji boleh sama-sama bersetuju mengenai prosedur yang akan digunakan di bawah Perkara-Perkara 5 dan 6.
3. Pihak-pihak berkuasa yang layak di Pihak-Pihak Pejanji boleh berhubung antara satu sama lain secara langsung bagi tujuan mencapai persetujuan di bawah Perkara ini.
4. Pihak-Pihak Pejanji boleh juga bersetuju mengenai bentuk-bentuk lain untuk menyelesaikan pertikaian.

**Perkara 12**

**Mula Berkuat kuasa**

Perjanjian ini hendaklah mula berkuat kuasa pada hari yang ketiga puluh selepas tarikh pemberitahuan yang kemudian dari dua pemberitahuan di mana salah satu

Pihak Pejanji memberitahu Pihak Pejanji yang satu lagi bahawa kehendak undang-undang dalam negerinya bagi mula berkuatkuasanya Perjanjian ini telah dipenuhi. Selepas mula berkuat kuasa, Perjanjian ini hendaklah berkuat kuasa —

(a) bagi perkara-perkara cukai yang melibatkan kelakuan sengaja yang boleh didakwa di bawah undang-undang jenayah Pihak pemohon (tidak kira sama ada terkandung dalam undang-undang cukai, kanun jenayah atau statut lain), pada tarikh itu, dan

(b) bagi semua perkara lain yang diliputi dalam Perkara 1, pada tarikh itu, tetapi hanya berkaitan dengan tempoh-tempoh kena cukai yang bermula pada atau selepas tarikh itu, atau jika tempoh kena cukai tidak ada, semua pengenaan cukai timbul pada atau selepas tarikh itu.

### **Perkara 13**

#### **Penamatan**

1. Suatu Pihak Pejanji boleh menamatkan Perjanjian ini dengan menyampaikan suatu notis penamatan melalui saluran diplomatik kepada Pihak Pejanji yang satu lagi.
2. Perjanjian ini hendaklah tamat pada hari pertama dalam bulan selepas tamatnya tempoh enam bulan setelah tarikh notis penamatan itu.
3. Jika suatu Pihak Pejanji menamatkan Perjanjian ini, kedua-dua Pihak Pejanji hendaklah terus terikat dengan peruntukan-peruntukan Perkara 8 berkenaan dengan sebarang maklumat yang diperolehi di bawah Perjanjian ini.

PADA MENYAKSIKANNYA, wakil-wakil yang bertandatangan di bawah ini yang telah diberi kuasa, telah menandatangani perjanjian ini.

DIPERBUAT dalam dua salinan di Bandar Seri Begawan pada hari ini 9 haribulan Mei, 2013 dalam bahasa Inggeris, bahasa Perancis dan bahasa Melayu, semua naskhah adalah sama sahnya.

KERAJANAN KEBAWAH DULI YANG ..  
MAHA MULIA PADUKA SERI BAGINDA  
SULTAN DAN YANG DI-PERTUAN  
NEGARA BRUNEI DARUSSALAM

BAGI PIHAK KERAJANAN  
KANADA

**WARTA KERAJAAN NEGARA BRUNEI DARUSSALAM**

---

Diperbuat pada hari ini 19 haribulan Zulhijjah, Tahun Hijrah 1435 bersamaan dengan 14 haribulan Oktober, 2014.

PEHIN ORANG KAYA PEKERMA JAYA  
DATO PADUKA HAJI AWANG JUDIN BIN HAJI ASAR  
Setiausaha kepada Majlis Mesyuarat Menteri-Menteri.